

عشقني ملاك

علا قنديل

أشعار بالعامية المصرية

صدرت الطبعة الأولى في سبتمبر ٢٠١٩

بطاقة الكتاب

عنوان المؤلف	عشقي ملاك
المؤلف	علا قنديل
التصنيف	أشعار بالعامية المصرية
رقم الإيداع	15532--2019
الترقيم الدولي	978-977-6726-47-5
تنسيق ومراجعة	الشاعر وليد مليجي
عدد الصفحات	١٠٤ صفحة
تصميم الغلاف	عنان عصام النظامي Anan.elnezamy@gmail.com

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الاقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



مؤسسة
النيل والفرات
للطبع والنشر والتوزيع
أسسها الشاعر ناجى عبد المنعم
حتم 2017

رخصة مزاولة مهنة: 58365 - سجل نقاري: 13242 / 2017 - بطاقة ضريبية: 35-01-572
 عضو عامل باتحاد الناشرين المصريين رقم 941 لسنة 2018
 هاتف: 01011256943 - 01116202218 - 01202541192 تليفاكس: 020554372901

النيل والفرات         

nagyegy200064@gmail.com
 alnilwaalfourat@gmail.com

(المقر الرئيسي: ج.م.ع محافظة الشرقية - العاشر من رمضان - مجاورة 13 - أمام سنتر الـ 13 - عقار 304)

إهداء

إليك يا من كنت لي ليس أخي الصغير فقط بل كنت صديقي
الكبير الذي أُلجأ إليه وقت الشدة والضيق فأجد عنده براح
الكون . إليك يا من كنت لديك القدرة على مسح دموعي قبل
أن تنزل . إليك يا من كنت تسمعني وتفهمني قبل أن أتكلم . إليك
يا من كنت لي بديلا لأبي وأمي بعد رحيلهما . إليك يا من لم
يمهلني الوقت أن أودعك قبل رحيلك وتركتني من بعدك جسد
بلا روح إليك يا من لم تتوانى أن تخبر الكبير والصغير وكل من
يعرفنا بعظيم مكانتي عندك ..إليك أيها الحاضر الغائب أخي المغفور
له بإذن الله تعالى " أحمد السويفى " أهدي ديواني الثانى .. عشقتني
ملاك

علا قنديل



تقديم

الكاتب هو جزء من المجتمع وهو لسان حاله ومرايته بغض النظر عن أهدافه .. ولو كانت كتاباته لا تعكس صور المجتمع بالكامل بكل صوره وأشكاله واطيافه يبقى يضحك على نفسه وعلى الناس .. وانا مش باكتب علشان تغير كلماتي الكون لكن يكفى انها بتقدر تغيرني من حال لحال وبحاول اسعد بيها كل اللي يعرفني ..

انا إلى بكتب كأني بنت بصفير وعندي م السنين يادوب
عشرين وبكتب عن قلوب شابت وجواها شوق وحنين وبردو
عن قلوب خافت يفوتها مركب العاشقين انا إلى احساسى بكل
اللي حواليا أكبر من الكلمات . انا إلى ... عشقنى ملاك.

علا قنديل

حرف باهت

نويت اسبيك من سكات
باعتر لك قلبي مات
والي فاضل بس منّا
هما حبة
ذكريات

قلبي عاش يسقيك محبة
وبأيديك تسقيه آهات
بعت عشرة عمر غاليه
والآمان آهو راح وفات
كان حنانك تمثيلية
والكلام أصبح سكات



إبقى دور يوم عليا
وانت تعرف الحقيقة
شوف حياتك أيه فى بُعدى
وانى من ظلمك بريئة
مهما عدت ذكرياتك
مش هافكر لو دقيقه
مش هاكمل مسرحية
قمت فيها بدور ضحيه
مش هاكرر نسخة مني
مش هاكون
من تاني هيَّ
إنسى ترجع تاني ليا
واني أرجع تاني ليك

كان وجودك
حرف باهت
جوا قصة خسارة فيك .



قسمتى

باعترف لك كان هروبي
آه إرادة ومش فرار
ياللى قلبك كان لقلبي
زي مأوى وبیت ودار
كنت تسأل ليه عيوني
يهربوا لما يشوفوك
بالحنان والحب كانوا
طول حياتي بيعشوك
والغرام والعشق كانوا
جواّ مني بيشتروك
عارفه إني قادرة أكتّم

جوه منى صرختي
بعد ما سكنت همومي
جوا روحي وفرحتي
كنت رافع روحي دائماً
وبحنان فوق السحاب
بس جبل الود بيننا
للأسف م القسوة داب
مش هاتلمح جوا عيني
لحظه واحدة دمعتي
وانسى إنك تاني تنفع
يوم تشارك فرحتي
والطريق هامشيه لوحدي
مهما كانت محنتي



وان في يوم اشتاقت ليك
هاقول لروحي كان هواك
مش نصيبي وقسمتي •

أنا... وهي

وكتير باعافر وياها
تلاعبني ... ألاعبها
أعاندها ... تعاندني
وياما كتير حاجات من دي
ونتراهن أنا وهي
ما يغلب عندها عندي
وكات ياما تلف تدور
وتتعامل بكل غرور
وكنت تملي بتصدي
ولا اسمحشي عليا تجور
وتجرح فيا وأداوى

ولا يبان لي جناح مكسور
وأحبس دمعي جوايا
واحاطه بيحي مليون سور
ومهما الليل عليا يطول
أقول لازم هاييحي النور
ونتصالح أنا ... وهي

مش راح اقول

و مش راح اقول
عشان متداري إحساسي
ورا حروفي ماباتكلمش
ولا يهْمش
وما بتفرقش
يقولوا جريئة وان قالوا
دي صابها جنان
يقولوا بريئة أو حتى
ساحرها الجان
يقولوا إني هيمانة
يقولوا ف شوقها غرقانه

ماباهتمش ولا ركزش
عشان إحسائي جوايا
مجرد همس
ماهو انت اليوم مع بكرة
وانت الأمس
وانت كل شيء ليا
وضي العين
وجوا العين .. باشيل طيفك
يا عمري وباقلل الرمشين
وحُبك أغلى شيء عندي
بقاله سنين
نصبيبي وقسمتي وقدري
وأُملي ودنيتي وعمري

ومين غيرك بقلبي يحس
واخاف يحسدوني عشان
عشقتني ملاك لكن أصله
يا ناس م الإنس .

سكة سفر

و أنا راجعة وفي السكة
حلفت ما انا
وقلت خلاص ما فيش داعي
بلاش أحلام
وقلت لنفسي ما تفوقي
من الأوهام
كفايه يا قلبي تشتاق له
ما ترحمني كفايه حرام
دا ياما كنت بانداه له
ما يسمعنيش
خلاص مش ممكن ارجع له

لأني يا قلبي صدقني
أنا في العندِ زبي مافيش
ولو شمسي هتستأذن
تبان في عينيه
هاقول والله ماقتلش
ولو قلبي نسي الضحكة
وجوه الروح سكن حزني
وقال لي هاعيش
هاكون راضية
ماهيش فارقة
وهاتعود على الفرقة
ولا زم اعيش
هايبقى الفرح شيء عادي

وجوده خلاص..
صبح ماضي مایسعدنیش
زمان یا حییی کان ممکن
ودلوقتی مایلزمنیش
صدی صوتک مع سکوتک
بقت أنغام ... ماتطر بنیش

إحساسي بيك

عشان عارفك
حبيبي وحافضة إحساسك
أنا صدقني في بعادك
باكون شايفاك
وحاسه بكل انفاسك
ولما تغيب ... وتبعد بالساعات عني
باحس البعد في غيابك
في كل دقيقة يقتلني
لأنني باغير
وبرضه لأنني مش لاقية
يا روجي للبعد تفسير

وعقلي يتوه من التفكير
مع الأوهام ألف وأدور
وقلبي يقول أكيد معذور
دا عمره ما كان في يوم مغرور
ويحبك ... ويتمنى الحياة ف قربك
ولا يقدر يغيب عنك
عشان الدنيا من غيرك
طريق مهجور
أنا بارجوك ..
حبيبي كفايه بينا بعاد
كفايه عناد
أنا واثقه هترجع لي
ويرجع فرح أيامي

بنظرة عين الاقيني
تدوب في ثواني احزاني
وتوعدني بانك تاني مش هاتغيب
يا عمري وكل أيامي
يا أغلى حبيب

شيخ العرب

مَدَد يا شيخ العرب

بابكي على حالي

وباغني موالي

صَرَخ الوجع فيَّ

الآهة تحلى لي

يا دنيا ماتحني

دا طريقي كله شقوق

مش عاجبك اني أقول

وبعلو صوت مخنوق؟

م الفرح ليه اتحرم

وانا نفسي منه أدوق؟

إسمع يا شيخ العرب
ودا أول الموضوع
ما ترد .. قول يا فرح
إمتى عليا تحن؟
من صُغر سني وانا
قلي الضعيف بيئن
وجع القلوب يا بشر
رابطينهُ ليه بالسن
نفسي دموع عيني
تفرقني يوم و تحن
واقول كفايا عتاب
أنا نفسي ضحكة ترن
أبوس إيديك يا وجع

ماتيجي نتفارق
أقفل وراك الباب
يمكن يكون فارق
أنا حملي ليه بالكوم
وضلامي كان حالك
نفسى فى لحظة هنا
وف فرحتى تشارك
طب ليه يا شيخ العرب
ورد الأمل شايك؟
قالوا لنا حبوا الخير
وبكره راح تلاقوه
الفجر مش هيغيب
ولا عنا يوم هيتوه

إزرع بذور الأمل
تلقى الولاد حصده
ياما ناس كثير بالصبر .. نالوا ما يتمنوه
النور يا شيخ العرب
بالكره ليه وصفوه؟

جالك قلب

وجالك قلب

تنسى قلب مشتاق لك

ومتلهف ينادي عليك

تعدي ساعات وراها ساعات

وروحى غريبه جوايا

ولا بتكمل أكيد غير بيك

وقلبي يخاصم الدقه

وروحى تفارق الرقه

واتحايلى عليه يهدّي

ولا يفكرش يوم يشكىك

ترد تقولي ...

دول هما يا دوب ساعتين
أرد واقول وانا مالي
طب اعمل إيه؟
دا في غيابك ...
مفيش ولا فرحة تهنالي
واحس الثانيه بتعدي كأنها عمر
وبتعدي كمان عمرين
واحس الحسره بكياني
عذاب الغربه ملكاني
سمايا الصافيه في غيابك
بتحول لرعد وبرق
وتيجي تطل في عينيه
بلهسة شوق وحنية

تقولى باحب مجنونة
تقولى باحب جنية
فيفرح قلبي من جوه
ودقاته يغولي
دي لما عينيك بترمش لي
وتيجي برقه تهمس لي
وتسألني ... حبيتي بجد زعلانه؟
أقول يا حبيبي ماقدر شي
لو ازعل أبقى غلطانة

أصدق مين

أصدق مين

كلامك ولا إحساسى
وانا حاسه معاك العكس
تقولى كلام بيان عادى
واشوف فى عينيك
كلام يتحس
واما عليا بتسلم
باحس معاك بلهفه وشوق
ولما أرد واتكلم
بيان ليلك كأنه شروق
والاقي روجي بتسلم

واشوف الفرحة تتبسم
وتظهر جوه نفسي حياة
ولو هاسأل عن احوالك
وليه شاغل كده بالك
تقول سارح في ملك الله
ولو مرة تغيب عني
شوقي إليك بيأسرني
معايا ف عز احلامي
ولا لحظة مفارقني
ولو مرة المحك صدفة
أخاف الروح تنادي عليك
فأتكلبش بأحاساسي
وتنده لي بسرعة عينيك

وتتكلم على الماشى
واشوف فى عينيك كلام حاسّاه
وأتللك قوام واهرب
واقول عندى ميعاد ناسياه .

باغني لك

باغني لك

و باسمع صوتي ينده لك

ويشهد إني باتمناك

واشوف عشقك

بيسكن كل تكويني

رسمتك ضي في عيوني

أنا ف الدنيا مالي سواك

ناديني خدني دفيني

وخليني أعيش الحلم

دانا عايشه الغرام وياك

فصول قصه واجمل فيلم

دا انت ف ديتي قري
ينور لي السما ومايروح
دا انت سكتي وقدري
طبيب شال عني ياما جروح
يا عشق بقلبي وسكنته
ملازمي منين ما باروح
دا عشقك نيل
يجري جوه أوصالي
بيرويني يرد الروح .

روحي مكسورة

عدى على فراقك سنين
ولسه عيوني بتبكي عليك
شايله جوه قلبي حنين
والوجدان بيهمس ليك
ولسه روجي مكسورة
عيون باصة على الصورة
للحظة فرح مشطورة
بعد عمر جمعني بيك
ويعدى العمر ومهما اعيش
غير ذكراك يا غالى ماليش

ياللي الدنيا كات عندي
لما تقولي متزعليش
إنت بعمرى كل الكون
مهما يثور معاك سكون
ومسيرنا يوم هنتقابل
لما يريد رب الملكوت
ولسه روي مكسورة
لعمر عشته وما عاشنيش
وذكراك اللي غيرها ماليش
ودمعة عين على خدي
تبدلها حنان إيدك
يسبني الحزن ما يزورنيش
ياغالي الدنيا من بعدك ماتلزمينش

وبكرة مسيرنا نتقابل
واودع دينتي ديا
ولما حبيبي نتقابل .. ساعتها هاعيش

يا مبخراتي

يا مبخراتي حظك قليل
ليه في الغرام شايفاك بخيل
من جنب بيتنا
ارمى السلام
وتعالى إسمع
أحلى الكلام
شاعر وحاوي
بيقول غناوي
يهوى الحكاوي
تعظيم سلام
وعشان دا أصلى

كلامه حصري
فنان ومصري عالي المقام
عاملين عشانه
في الكون عمائل
حتى ف كلامه
أسلوبه هايل
لو يوم قابله
تديه وسام
الواد مخاوي
جنية عاشقة
بنت اللى هيَّ
أجمل صبية
مُهرة وعفية

من غير لجام
تعمل بحرفة
مليون حكاية
دي عينيه بتحكي
مليون رواية
عشقه في ليلة
لو غاب تجيله
ولحظة حضوره
تنسى الكلام
بتزور مقامه
تفضل تطوف
حوالين مكانه
ولا بيها خوف

شلال دموع
بدل الشموع
لو حد زاره
أولف جاره
إن شالله حتى
لو في المنام

غربة

يا غربة واخذاني
إمتى منك أعود
مشينا سكة سفرنا
ما كانش فيها وعود
إزاي هنرجع
وامتى الزمان هيجود
سافرنا وعز منا
نزرع لخطوتنا وجود
وطلبنا أحلامنا
من الواحد الموجود
لف الزمان بينا

وحاصرتنا وحدتنا
يا صبر راضينا
إسكن هنا بيتنا
ياليل إحباطك
هدّينا ما هدتنا
وعلى قد ما قاسينا
والدنيا عاندتنا
حاولنا تاني نعود
حاوطتنا غربتنا
ومن شقوق اليأس
دخل الأمل بشوئش
قال لي تعالي نحلم
بالفرح لاجل نعيش

حكمة وقالوها زمان
مش كلمة لل دراویش
الى إيمانه صحيح .. مهما يكون بيعيش

قلبك بس سيهولي

يا ريت قلبك تسيهولي
يداوي جرح جوايا
أنا عايشه كما الأموات
على ذكرى مع حكاية
نهايتها دموع وآهات
ومن ماضي صبح ذكري
وطيفه باشوفه في مراية
يا ساكن جوه وجداني
هموم الدنيا واخداني
ودقت الظلم وباعاني
وعمري ما قلت آه ياني



أنا شايفاك قمر ليلي
وحاساك ميّتي ونيلي
وفي العتمه قناديلي
ورغم الحزن والتوهة
نهارى معدي علي ليلي
بحس بأني جنّة
في بحر العشق منسية
دموعي بتجري فوق خدي
كما الأنهار ما بتهدى
وحاسّة اني كتاب مقفول
علي رف الغرام مهمول
حروف مكتوبة علشانك
تعالى اقراني يلا وقول

وخلي العشق بينا يطول
دا أنا عايشه في وجدانك
بداري بدمعي أحرانك
ولما الدنيا تبقي هدوء
وفرحتنا تاخدنا لفوق
أحس الحب فاحضانك

أصعب شيء

لما القلب ف عز ما يفرح

يبقى حزين

واما النبض ف عز ما يرقص

يبقى سجين

ولّا عيوني مهما يشوفوا

مش شايفين

أصعب شيء

تكتّم حبك جوه النبض

وتقول إنه خلاص اهو مات

وان جه مرة تاني وشاغلك

قول كان ماضي

وعدّا وفات
أصعب شيء
إني ف حُضنك
أحتاج حُضنك
واتمنّاك تسكن جُوايا
واني أحس معاك بالغربة
مجرد حرف
في أحلى روايه
أصعب شيء
إن العقل يكون متحير
وان القلب يحن إليك
كل ما احاول أبعد و اهرب
ألقي الروح

بتنادي عليك
أصعب شيء
لما الحيرة تكون ساكنك
وان حياتك تبقى هلاك
وأما ف عز الفرحة تلاقي
إن الحزن بيتمنك

أصعب شيء
لما العمر يعدى قصادي
والأحزان ألاقها تنادي
والمحطات الحلوة ما بيننا
من غير طعم وصبحت عادي
أصعب شيء
إن القلب يدوب في هواك

ويعيش عمره يبتمناك
تزرع جوه الروح صبار
وهو يشوفك أحلى ملاك
أصعب شيء

إني أحسك يوم بتبيعني
وانت كمان اللي بتخدعني
واما باكون بآتمنى تقرب
ألاقيك جاي وبتودعني
أصعب شيء

إني أشوفك جوه النني
عاشقه هواك وقریب مني
تبعد نفسي ولما تقرب
تعشق روحي انك تأسرني

أصعب شيء
إن الفرحه ف عيني تموت
يسكت جوه الخالق الصوت
والقى العمر اتسرب مني
والأحلام بقى ليها تابوت

محتاجة لك

باعترف لك

مش بكابر

إني دائماً محتاجالك

واني عاشقه واني دايرة

فوق ما يتصور خيالك

واني بافرح لما اشوفك

أوفي بالي يهل طيفك

واما باحلم بيك أكيد

كل يوم ييفوت عليا

يبقى بالنسبالي عيد

ترقص الفرحة ف عينا

والألم يبعد بعيد
واما صوتك بيناديني
بعشقه واعشق سكوتك
يسالوني ١٠٠ سؤال
هو قلبه ليكي مال؟؟
ولا دا وهم وخيال
وانتي بس عايشة فيه؟؟
نفسك الفرحة تزورك
بعد حزن وبتداريه؟؟
جوه منك حلم غايب
إنتي نفسك تحليه؟؟
والبراح ما بين ضلوعه
إنتي وحدك تسكنيه؟؟

محتاجاله وبتناديه؟؟
عائشه عمرڪ بس ليه؟؟
رد قلبي طب وماله
ليه اداري شوقي ليه
دا اللي نظرة
واحدة منه
تسوى عالم باللي فيه

هاقول لك حاجة

راح اقولك

حاجة وتسمعها

ومن غير تزويق

من غير ما أدور

على حرف

ف وسط كلامك

بيبل الريق

ولا ألمح حتى

ف نظراتك

معنى سكاتك

وأنا زي غريق

متعلق فيها بقشاية
وأزاي ممكن
على بعدك أطيق
أنا نفسي
حياتي نكلها
وتكون لي رفيق
كلماتك دايمًا تلامسني
بتنير لي طريق
ييشاوروا
علينا ويقلوا
إن انا وانت فريق
خلينا نكمل سكتنا
ونعيش أحباب

جوه ف بيتنا
والناس تسمع
صدى ضحكنا
محظوظة الفرحة
اللي لقينا
وأنا قلبي شاريك

أنا مين؟

وسألوني : وتطلع مين ؟

فقلت لهم ...

أنا الواقف ما بين البين

أنا عايش من العايشين

أنا واحد لكني اتنين

أنا الشقيان وانا الحافي

أنا شايلك على كتافي

واقولك قولي ما تخافي

ولو وقفت مراكبنا

دراعي هيبقى مجدافي

وهازرع لك صحاريكي

وأحلف إنى اكون ليكي
واخضّر أرضك البائرة
بدمي وروحي أرويكي
وانا الواقف على حدودك
أنا جندي مع جنودك
يسيل دمي على أرضك
واشوف البسمة في خدودك
دا انا حارس ميادينك
وانا القايد قناديلك
ورافع في السما علمك
دا كل الناس محبينك
كان مظلوم بحال مايل
ودمي ع الرصيف سايل

وانا المحتاج ومش طایل
تملي عليكي باتحایل
ولو بان حزني في عيوني
راح امسح دمعي وادعي لك
ولو ع الجنة ودوني
راح أرجع تاني وأجلك
ولو من تاني سألوني ؟
هارد واقول ...
أنا الواقف ما بين البين

يا ناس قولوا لي

ياناس قولوا لي انا اعمل إيه

إذا قلبي وقفت دقاته

مش ناوي

يرجع ثاني يروق

إلا أمّا

يسمع ضحكاته

وعيونني رافضه تشوف في الكون

غير فرحته وابتساماته

وايديا حالفه

ما تحضن غير

حب سمعت نغماته

ياناس دا انا

من نظرة باتوه

في بحر عينه

واه ياني

وبس لو هاهمس

باسمه

بيبقى كوني لون تاني

من يوم ما شوفته وحبته

عزفت أجمل ألحاني

الشهيد

مش قادرة اقول

مات الشهيد

موجود في

جنة ربنا

قومي افرحي

يا ام الشهيد

إبنك مكانه

ف قلبنا

إبنك عريس

من فرحته

مدفون بدمه

فُ تربته

كفنه العلم

اللي يحكى

قصته

قصة بطل

مات ع الحدود

كان حلمه تاني

فُ يوم يعود

وكان نصيبه وقسمته

واوعى في يوم

تاخدي العزا

الحق ده

مش حقتك انتي

دا حقنا
ناخد بتاره
م اللي خان
واللي أذى
إبنك منارة
ف قلبنا
ومثال لغيره
يحتدى
وأكيد هناخد حقنا
م اللي اعتدى
وابن كذا وابن كذا
أما الشهيد
فعند ربه

في النعيم
ريحته عبير
بيفوح شذى

التحدي

حزن متداري ف ضلوعي
غصب عني ومش بطوعي
ناره قايده في قلبي والعة ؟
والآمال الحلوة ضايعة
حتي طعم الدنيا مايعة
بس مش هاعلن خضوعي
حزن حانرج من عبايته
هارفضه وارفض وقوعي
هاروي للعالم حكايته
وابتدي سكة رجوعي
هانتفض وافتح لي طاقة

والطريق هاوصل نهايته
هاهدى نفسي ورود وبقاة
أحلى حب رفعت رايته
حب جوه القلب ناره
زي حزن الليل وآخره
جاي براحتة واختياره
مين بقى يقدر يتاخره
أنا هامسك في حلم بكره
وارسم ملاح ضحكته
ويدق قلبي ويفرح
مشتاقه أوصف لهفته
لما الشمس تشرق بعيني
والأمل يعشق يحيني

عارف طريقه وسكته
دا لو الحزن موجة عاتية
هتتكسر على صخرته

معاك بافرح

يحيني الفرح

بافتكرك

واشوف الضحكة

جوه عينيك

وانا حزينة

يزيد ذكرك

واتمني أبكي

أنا بين إيديك

أنا عاشقة

باقولها لك

وفوق ما يخطر

ببالك
سعادة الدنيا أجيبالك
وأبدرها كدا
حوالك
أنا بالفرحة
باتعطر
وحلو كلامك
يكفيني
تنور خطوتي
اتخطر
ون عينيك
دا قنديلي
ضمني بعينيك نسييني

إني عايشة
بين الناس
كلمة صغيرة
تكفيني
تعيشني إجمال إحساس
جوه منك بالقي
روحي
ومعاك باحس
بالآمان
لمسة إيدك
دواء لجروحي
نسّيني بيك الأخران

حبك عشق

ياللي حبك جوا قلبي
عشق فاق حد الخيال
بُعدي عنك دا استحالة
شئ مايقبلش احتمال
الفراق مايننا إصبح
يا حبيبي شئ محال
كل حروف العشق تشهد
إنك انت ملكتها
شافوا كل الدنيا جنة
لما قلبك حبها
لما اشوفك بابقى قاصدة

إني أطول في الكلام
رافضه إن الوقت يجري
وابقي جنبك في انسجام
كل لحظة تعدي بينا
زي حلم يفوت قوام
نفسي أقول لك حاجة واحدة
عايزه تسمع باهتمام
لما بس تكون معايا
واحس إنك راح تنام
قلبي يتطمئن ويهدأ
واجري اسابقك في المنام
أقول هناك أكيد هشوفك
ونكمل باقي الكلام

كل ده ألقاه يحصل
قبل ما افكر أسيبك
أو أرد عليك .. سلام

في غيابك

في غيابك

يصارع عقلي بدل الفكرة

١٠٠ فكرة

وليلي حزين ومش راضي

يكون له نهار

وحر في يحكي عن أمسي

وعن بكرة

مشاعر شوق مع الأشعار

دا في غيابك

تسيبني الروح وليك ترحل

بدون تنبيه ولا إنذار

تنام روحي بوجدانك
وانام وحدي مع الافكار
وجزر ومد يملكني
ماهوش ساكت
واحسه يبسبق
الإعصار
دا في غيابك
أقول القلب ده نساني
واشوفك فجأة
قدا مي
تقول لي حبيبي وحشاني
وبان لي نهار
ولو هتغيب

تعيشني الوحدة
وما اعيشهاش
علشان ذكراك بتحيني
اغمض عيني واتمناك
فَ تسعد قلبي وسنيني
واشرب م الكاسات ذكري
تسكرني وترويني
واراجع في الخيال طيفك
واحسك جوه تكويني
ولو بينا حبيبي بحور
ألاقي إيديك تعديني

جاوبوا و قولوا

يَبْقَى دَا إِيَّه ؟
لَمَّا أَحْسَسَ بِنَبْضِهِ
جَنُونَ

وَيَعِشُّقُ مَوْجِي
أَحْلَى عَيُونِ
وَأَسْمَعَ هَمْسِهِ
أَنَا لِيَكِي أَكُونُ
يَبْقَى دَا إِيَّه ؟؟
وَلَمَّا كَلَامِي
بَسَ عَلَيْهِ
صَوْتُهُ سَكُوتُهُ

رَمَش عینیه
فرح الدنیا
وعشقی انا لیه
یبقی دا ایہ ؟؟
ولما أحس
بہمستہ نار
تقلب لیلی کلہ نہار
عشقہ دا قدری
أنا مش باختار
یبقی دا ایہ ؟
ولما ما اشوفش
فُ دِنیتی غیرہ
ويعشق رمشي

يَبْقَى آسِيرَهُ
وَكُلَّ كَلَامِ الدُّنْيَا عَلَيْهِ
جَاوِبُوا وَقُولُوا دَا مَعْنَاتِهِ إِيَّاهُ؟

ذكريات

لما بافتكره بادوب
وارجع واعيد كل الشريط
من أوله
وأسرح وأعيش مع همسه
وكل حسه
ولما قلبي حن له
ماهي ذكري حلوه
متتنساش
حبه في قلبي
معايا عاش
وبلاقي قلبي ف كل لحظة

يرق له
ما هو لسه بردو الود بيننا
ما انت هاش
أحاسيس جميلة
باكن له
واسرح واروح لاول لقاء
وسعادي لما سمعت له
ماهي ذكريات عدت بقي
ومعدش حيي يحق له
بروزت صورته جوه قلبي
وكل ثانيه بابص له
فين لما كان تليفوني عاشقه
وكل لحظة

یرن له
آه یانی منک ذکریات
بتوجعینی
نفسی یفکر یوم یزورنی
أویحینی
من یوم فراقنا
کل یوم عدا علیه
باعد له
منالسه بافتکره وادوب
وارجع واعید
کل الشریط من أوله

مستنية تقولها

بس كلمة حب ليه

أبقى ليك اجمل

صبيه

وانت قلبك يبقى ليه

والغرام مايكفيناش

كل ما بقرب باخاف

يبقى بينا سنين عجاف

يحلف قلبي انه ماشاف

زى عيونك السمرا ديا

ياللي موجك جوه بحري

وف وريدي ودي يجري

شمس عينك لما تضوي

جوه عيني

ما بانساهاش

ياللي نبضك جوه مني

بينادي لك تبقى مني

واما قلبي يهمس اني

لسه حبك ما ابتداهش

بتقول انا مين

بس اما تيجي

عيوني في عينيك

وأنده واقول

انا ملك إيديك

عقلي وروحي

اتعلقوا بيك

هاقول انا مين

انا الحلم اللي أحلامك

بتشبهها

أنا الفرحة اللي أيامك

بتندهها

أنا قسوة
ما تمنيّش
ولو لحظه تجربها
أنا البحر اللى من شوقك
بتنده ليه
لو ازعل مرة صدقني
هتغرق فيه .

إبني الغالي

والله دا الغالي
تعبه يحلى لي
يخطر على بالي
ليلي يبقى نهار
لو بس يتمنى
حته من الجنة
بأيديه ما استنى
وازرع ورود وازهار
أكتب له على كفي
يا أمر وما يكفي
عمري ما يوفي

وارويه من الأنهار
في القلب والنبي
حبه إلى آسرنى
لحظة ما يأمرنى
يلقى اللى قاله صار
دى بسمته ليه
مليانه حنية
باحضنها بإيديه
وبتملا كل الدار
دا يجرى فى وريدي
وميلاده يوم عيدي
يا فرحتي زيدي.. وكللي المشوار

يا دنيا

يا دنيا عيب مش كدا
إمتى نصالح بعض ؟
نفسي في لحظة رضا
إدينى منك وعد
أيامى متلخبطة
حزنك ضلام حالك
والعيشة متخبطة
إمتى يروق حالك
سايقه عليكى الوجد
عليا لتحني
ملت عيوني البكا

حزنك ملازمي
إمتى أنول الرضا
واخطر على بالك
ولا بلاش كل دا
لو همي يحلى لك

بجبك

هو انا قلت لك

اني بجبك

وانك ساكن وجداني

طيب قلت لك اني ف قربك

أحلم في الدنيا

بايه تاني ؟

حتى العصافير اللي بتطير

بسمع غناها

ف وداني

والشمس

بتشرق بعيوني

لو بس
تخطر على بالي
وألوان السما
تيجي تنور
لو رمشك عدّي وناداني

بتلمع ليك

بيقولوا عنيه بتلمع ليك
لحظة ما باقابلك او اشوفك
والقلب يرقص م الفرحة
لو بس يعدى عليه طيفك
يا حبيبي واغلى الناس عندي
عاشقك بكلامك وسكوتك
ياللى انت الدنيا جوايا
وانا مهما اقولك واوصفك
حرفي وانغامي دا من صوتك...

رباعیات

عمار یا مصر

في ليل اليأس تطلع شمس
تحي الضله وتنور
أقول يا مصر دا كان درس
مسير ديتنا تتطور

=====

تعبنا من عذاب الأمس
ودنيا كات بتتدهور
شبعنا م الحقيقه طمس
فساد كان فوق ما نتصور

=====

وصلينا صلاتنا الخمس
وعجَّلنا بأيدينا بتدور
وتتلامس قلوبنا لمس
وأرضي الحرَّة مش حتبور

=====

ولاد بلدي يا أجدع ناس
سواعدهم تهد اليأس يتكسر
قلوب صافيه كما الألماس
وأحلامهم بقت واقع بيتفسر

=====

ياما احلى حضنك الدافى
باحس معاه بكل أمان
دا انتى ف بحري مجدافى
بتاخدني بأحلامي لكل مكان

=====

جدلت الصبر بصفائى
وحطينا الأمل عنوان
زرعنا النبتة زاد خيرى ..
بدل حنضل شجر ريحان

=====

الشاعرة في سطور

- علا قنديل - شاعرة تكتب الشعر بالعامية وتميل معظم قصائدها الى الشعر الرومانسي
- كتبت أيضاً شعر الأغنية وخاضت تجربة التلحين لعدد كبير من أعمالها .
- لها بعض التجارب البسيطة في كتابة شعر الفصحى
- تخرجت من كلية التجارة - وحصلت أيضاً على ليسانس الآداب وذلك لحبها الجم للعمل التربوي وخاصة مجال الأطفال .
- تعمل مديرة لإحدى المؤسسات التعليمية الكبرى
- عضو نادي أدب مصر الجديدة
- سبق أن صدر لها ديوان تحت عنوان : بنت مصرية -
- حكايات علا (للأطفال) - أغاني حروف الهجاء من الألف للياء (للأطفال)
- لها عدد من اللقاءات التلفزيونية المتعددة وتم نشر أعمالها في

عدة صحف ومجلات

- فازت بأكثر من مركز بإشتراكها في أكثر من مسابقات أدبية .
وقامت أيضا بالمشاركة لأول مرة في عمل مسرحي كبير بإسم
(سكوب) حيث قامت بكتابة جميع أشعار وأغاني المسرحية
بالكامل وقد تم عرضها على مسرح مكتبة مصر الجديدة .
-ضيفة ككاتبة وخبيرة تربوية وشاعرة ببرنامج أطفال اليوم باذاعة
صوت العرب.

الفهرس

- ١- إهداء..... ٢
- ٢- تقديم..... ٤
- ٣- حرف باهت..... ٥
- ٤- قسمتي..... ٨
- ٥- أنا وهي..... ١١
- ٦- سكة سفر..... ١٦
- ٧- إحسائي بيك..... ١٩
- ٨- شيخ العرب..... ٢٢
- ٩- جالك قلب..... ٢٦
- ١٠- أصدق مين..... ٢٩
- ١١- باغني لك..... ٣٢
- ١٢- يا مبخراتي..... ٣٧
- ١٣- غربة..... ٤١
- ١٤- قلبك بس سيهولي..... ٤٤

- ١٥-أصعب شيء.....٤٧
- ١٦-محتاجالك.....٥٢
- ١٧-هاقول لك حاجة.....٥٥
- ١٨-أنا مين.....٥٨
- ١٩-يا ناس قولوا لي.....٦١
- ٢٠-الشهيد.....٦٣
- ٢١-التحدي.....٦٧
- ٢٢-معاك بافرح.....٧٠
- ٢٣-حبك عشق.....٧٤
- ٢٤-في غيابك.....٧٧
- ٢٥-جاوبوا وقولوا.....٨١
- ٢٦-ذكريات.....٨٤
- ٢٧-مستنية اقولها.....٨٨
- ٢٨-إبني الغالي.....٩٢
- ٢٩-عمار يا مصر.....٩٥

- ٣٠- يا دنيا ٩٨
- ٣١- بحبك ١٠٠
- ٣٢- يبيع بيك ١٠٢
- ٣٣- الشاعرة في سطور ١٠٣